

# No Servus, Diener und Habe die Ehre!

Etze kummt dos

## Nej su wos

vu Sömde, n 25. Feber 2023



*Inge Fehrmann*

---

## Wöntrsport

Bei uns ar Familie wors Schiefohrn, Rodln, Schleifn dr iebliche Wöntrsport. Nerne ne vrgassn war ich s Schiefohrn 1956 uf n Nabelhorne. Drbeine worn de Muttr, de Tantt Lia und Gertl, mei Onkl Siegi - Lias Mon, mei Couseng Dieter und natierlich iech. De Muttr wor frsch Assen zuständig. Wos mejntr denn, wos mitgenummn wur? Ane große Schissl Arepplsolot, Rejchrworschte vun Klier-Flejschern, Sammln vun Possltbäckn, saure Kurkln vu Brosche Erichn, ejne Thermoskanne Tee **mit** Struhrum und ejne ouhne Rum wurm zomgepackt. Ei dan Sacklein-Rucksak mit Ladriemsln kom noch Reserveklejdrzeug. Ogejackt worn mr, wie wenn mr zun Nordpole fohrn tätn, iech mit menn Cousengs Housn und Anorack vun letzn Juhre. Obzwor ich mich wajgn dan Housentierl geschamt ho, gobs dou kejne Widerrede und kej Meckern und kej Zetern. Su worsch halt. Ich wollte jo mitfohrn.

Om Bohnhoufe hout schun dr Rest vu dr Familie gewort. Dr Bohnschoffner tot zr Obfohrt orscht pfeifn, wie mr olle eigestiegn worn, und dos wor mit Bratln, Steckn, Rucksäckln und dan ne sehr komfortabl Schieschuhn gor ne ejfach. Mr stolperte mieh, wie doss mr lief. Salt hotte s noch horte Holzbänke und de Dampflokomotive tot pfeifn und dampfn und stinkn. Obr dos machte nischt, mir frejtn sich uf de Fohrt, und s gob jo glei Arepplsolot, Rejcherworschte und Kurkln. Mr prajgltn und praatschtn, Siegi drzählte, doss r drhejme noch schnell mit n worm Biegleisn de Bratl gewachst hotte. De Muttr wor herich ne sehr begeistert, dosse drnouch dos ganze Wachs hout wiedr vun Biegleisn obmachn missn.

Ei dr Nablhornbohne stonnd mr su enge, doss kenner hout ömfolln kenn. Ei enn Dune kunkste mr enner seine Bratl, Steckn odr enn Rucksak ei de Gusche. Ubn worsch Oziehn und Festmachn vun Schiern mit Riemsln gor ne su lechte. Siegi holf. Dr Fohrstil vu maner Muttr und dr Tante Gertl wor noch vu drhejme – dr Telemark. Die zwej Schwastrn hon de ganze Brejte vu dr Bohne gebraucht und de Seiten mehrschtns ofn Hindrtejle gewechselt. De andern Schiefohrer hon sich eschoffiert, geschömpft und mitn Steckn gestekuliert. Lia, Siegi und Dieter sein vurausgefohrn, schnell und elegant mit Parallelschwingn. Dazwischen fuhr iech im Schniepluge, schiene langsam, und moichmoul ho ou iech de Seiten om Hindrtejle gewechselt. S Ufstiehn wor ömmer sehr miehselich. Of ejmoul hierte mr lautes Gelächtr, de andern Schiefohrer worn gornemieh biese, nej, se totn sich kieniglich amisiern: Mane Muttr und Gertl worn ei dr Mitte vu dr Bohne zomgefohrn und totn om Ollwertestn a Stickl n Barg nundrtschindrn. Dos ös ou su a Fenomen ban Schiefohrn: Mr fährt grodejwajgs offanandr zune und kon ernewie nemieh öm dan andern römfohrn. Uf die Ort hotte sich mane Muttr bei ihrer Schwastr ei dr House vrfangn und praaz, ane Nouht wor vu ubn nouch untn ufgerössn. De House vu dr Gertl tot wie ane Fohne plejdrn. Miehsom stonnd se wiedr uf, und dann gings mit dar loftschn House bis zur Seealpe-Zwischenstatioun nundr. Dorte hout dr Rest vu dr Familie schun sehr ejsne Flunsche gezoin, ou weil mir Dreie ömmer noche lachn totn. Dasdrholbn hon mr sich drnouchrn ufgetejt. Lia, Siegi und Dieter sein mit n Schiern vollends nundr gefohrn - und mir mit dr Bohne.

Untn hon mr sich vur lautr Miedichkeit wiedr vrtrohn, minandr an Zuge enn Plotz gesucht, n Rest vu unsn Rejchrworschn, Sammln und Kurkln vrdrickt und enn Nickrich gemacht.

Dar döchtsche Wöntrsport-Tag ös uns bis heute an Gedächtnisse gebliebn, obr jedr vu uns tot dos Drlabte nouch sennr Fassong drzähln. Dos ös halt ofte su bei Familien-Geschöchn.

Mejntr ne ou?

---